



Adran Economi a Chymuned



Mae'r Adran Economi a Chymuned yn cynnwys ystod o wasanaethau sydd yn anelu at wella llesiant economaidd, cymdeithasol a diwylliannol cymunedau Gwynedd.

Yn ogystal â'r gwaith ddydd i ddydd a amlinellir isod, mae'r Adran hon yn arwain ar y prosiectau blaenoriaeth ganlynol:

- 1) Gweledigaeth Twf Gogledd Cymru - (Blaenoriaeth Gwella 1)
- 2) Creu Swyddi Gwerth Uchel - (Blaenoriaeth Gwella 1)
- 3) Arloesi Gwynedd Wledig - (Blaenoriaeth Gwella 1)
- 4) Hybu Canol Trefi - (Blaenoriaeth Gwella 1)
- 5) Rhoi Treftadaeth Llechi Gwynedd ar waith - (Blaenoriaeth Gwella 1)
- 6) Busnesau'n Cael Cymorth i Ffynnu - (Blaenoriaeth Gwella 1)
- 7) Twristiaeth - llunio cynllun twristiaeth gynaliadwy - (Blaenoriaeth Gwella 1)
- 8) Adfywio: Llunio cynlluniau adfywio ar gyfer ein hardaloedd - (Blaenoriaeth Gwella 1)
- 9) Mwy o drigolion Gwynedd i Chwarae Rhan Lawn yn y Byd Gwaith -(Blaenoriaeth Gwella 3)

Dyma fraslun o waith yr Adran yn 2022/23:

Gwasanaeth Datblygu Economaidd

Mae perfformiad yr economi yn effeithio ar ansawdd bywyd trigolion Gwynedd gan ddylanwadu ar gostau byw ac incwm aelwydydd. Rydym yn cydweithio gyda phartneriaid i greu'r amodau i fusnesau a mentrau sefydlu, cystadlu a datblygu yng Ngwynedd gan greu a chynnal swyddi o ansawdd ar draws y sir.

Parhaodd Covid-19 i gael effaith sylweddol ar gyflogwyr a busnesau Gwynedd yn 2020/21. Roedd ystod eang o fusnesau wedi gorfod cau yn ystod rhan gyntaf y flwyddyn ac roedd hyn, yn ei dro, wedi effeithio ar yr economi gyfan. O ganlyniad, mae nifer busnesau, cynhyrchiant a gwerth busnesau wedi gostwng. Mae Brexit hefyd wedi creu ansicrwydd i nifer o fusnesau, yn enwedig busnesau sy'n ddibynnol ar allforio a mewnfario nwyddau allweddol, ac mae ystod eang o fusnesau yn ei chael hi'n anodd recriwtio digon o weithwyr.

Mae lefelau cyflog yng Ngwynedd yn parhau i fod yn llawer is na rhannau eraill o Gymru ac mae gwerth cynhyrchiant busnesau Gwynedd yn isel o'i gymharu ag ardaloedd eraill. Mae'n bwysig felly fod Cyngor Gwynedd yn cymryd camau rhagweithiol i greu'r amodau fydd yn sbarduno twf yn yr economi a hynny mewn cyfnod o ansicrwydd economaidd.

Roedd 16,010 o fusnesau, mentrau a chwmnïau cymunedol yng Ngwynedd yn 2019. Mae'r Adran yn darparu gwybodaeth, cyngor a chefnogaeth ymarferol i'w helpu i sefydlu, sefydlogi a datblygu er mwyn cynnal a chreu swyddi. Mae'r Gwasanaeth yn rhoi sylw arbennig i gefnogi busnesau drwy ddarparu gwahanol

2,188



o grantiau wedi eu rhannu i fusnesau Gwynedd yn 2020/21 gwerth £4.3M

becynnau cymorth busnes a hyrwyddo arloesedd i fusnesau gan eu hannog i wneud gwell defnydd o dechnoleg yn enwedig yn yr ardaloedd mwyaf gwledig.

Mae'r gwasanaeth yn gweithio'n agos gyda Bwrdd Uchelgais Economaidd Gogledd Cymru i ddatblygu prosiectau i wella cynhyrchiant economaidd y rhanbarth a chreu swyddi gwerth uwch yn y sir. Yn sgil y cynnydd sylweddol yn y gofyn am weithwyr rydym hefyd yn cydweithio gyda phartneriaid er mwyn cefnogi busnesau i gyflogi a phobl Gwynedd i gael mynediad i swyddi.

Dros y flwyddyn nesaf byddwn yn parhau i geisio deall effaith hir dymor Covid-19 a Brexit ar fusnesau Gwynedd gan godi ymwybyddiaeth o ffynonellau cymorth er mwyn galluogi busnesau i ymdopi â'r newid. Byddwn hefyd yn adolygu ein blaenoriaethau er mwyn sicrhau ein bod yn darparu help sydd yn elwa pobl Gwynedd ac yn cyfrannu at gynnal ac adfywio ein cymunedau.

Gwasanaeth Twristiaeth, Marchnata a Digwyddiadau

Mae'r diwydiant twristiaeth yn gyflogwr allweddol yng Ngwynedd. Gyda gwerth economaidd o dros £1.35 biliwn, roedd dros 18,200 o bobl yn gweithio yn y maes yn 2019, ond mae'r economi ymweld wedi cael ei effeithio'n sylweddol gan Covid-19 gyda busnesau wedi bod ar gau am gyfnodau sylweddol a digwyddiadau wedi cael eu hatal. Disgynnodd gwerth y sector yn 2020 yn sylweddol i £575miliwn a chyflogaeth i lawr i 9,570. Wrth i gyfyngiadau gael eu llacio dros gyfnod yr

haf gwelwyd nifer ymwelwyr i brif gyrchfannau ymwelwyr yn cynyddu yn sylweddol gan roi pwysau ar gymunedau lleol. Er mwyn gallu ymateb i bryderon cymunedau a busnesau, mae'r Cyngor wedi cynnal adolygiad o'r maes a mabwysiadu cyfres o egwyddorion er mwyn galluogi'r sector adfer a datblygu'n gynaliadwy i'r dyfodol er budd a lles pobl Gwynedd.

77,570

o ddilynwyr ar gyfryngau cymdeithasol Eryri, Mynyddoedd a Môr yn 2020/21



Yn 2022/23 bydd y gwasanaeth yn canolbwyntio ar wireddu a gwreiddio Cynllun Economi Ymweld Cynaliadwy Gwynedd ac Eryri 2035 a'i Gynllun Gweithredu.

Gwasanaethau Morwrol

Gan fod tirwedd ac amgylchedd naturiol Gwynedd mor bwysig i ffyniant y sir, mae'r Adran yn ceisio sicrhau **adnoddau diogel o ansawdd yn ein harbryau, ein marinas ac ar draethau** Gwynedd er mwyn creu adnodd hamdden i hyrwyddo llesiant trigolion lleol ac ymwelwyr. Mae'r Adran yn gyfrifol am reoli hyd at 301km o arfordir a thraethau ond yn canolbwyntio ymdrech ar reoli'r prif draethau gwobredig. Mae hefyd yn rheoli 4 harbwr yn Aberdyfi, Abermaw, Porthmadog a Phwllheli yn ogystal â 2 marina, sef



1,777 o gychod a **923** o fadau dŵr personol wedi eu cofrestru yn ystod 2018/19

Hafan Pwllheli sy'n cynnig angorfa i 400 cwch a Doc Fictoria yng Nghaernarfon sy'n cynnig angorfa i 95 cwch.

Gwasanaeth Rhaglenni Adfywio

Mae nifer o ffactorau economaidd, cymdeithasol, diwylliannol ac amgylcheddol yn cyfuno i wneud Gwynedd yn le arbennig i fyw, gweithio a mentro. Ond mae rhai o'r cymunedau lle nad ydi grym y farchnad yn gryf angen hwb ar adegau er mwyn gwyrddroi dirywiad, ac er mwyn ymateb i heriau sy'n eu hwynebu cyn gallu cyflawni potensial i'r dyfodol. Adfywio ydi'r broses yma ac mae'n **ymdrech fwriadol i gydweithio gyda phobl Gwynedd a phartneriaid i wella ardaloedd.**

Nid oes modd i un Adran gyflawni amcanion agenda Adfywio Gwynedd ar ei phen ei hun. Er mwyn gwneud gwahaniaeth hirdymor a gwneud y defnydd gorau o adnoddau rhaid cydweithio ar draws Adrannau'r Cyngor, gyda'r gymuned ac amrywiaeth o bartneriaid cenedlaethol, rhanbarthol a lleol. Mae'r Gwasanaeth Rhaglenni Adfywio yn cydlynu'r ymdrechion hyn ar draws y Cyngor ac yn arwain ar gyfres o brosiectau sydd wedi cael eu hadnabod fel blaenoriaethau gan gymunedau Gwynedd. Un maes amlwg sydd wedi ei adnabod gan gymunedau ydi cyflwr canol trefi a phryder am rôl canolfannau masnachol i'r dyfodol.

Yn ystod 2022/23 bydd y gwasanaeth yn rhoi sylw arbennig i raglenni i adfywio canol trefi gan dargedu ardaloedd lle mae'r newid mwyaf wedi ei weld mewn patrymau manwerthu.

Gwasanaeth Cefnogi Cymunedau

Mae'r Adran yn darparu gwasanaethau er mwyn i bobl Gwynedd wneud ein cymunedau yn llefydd gwell i fyw. **Mae'n bwysig bod grwpiau gwirfoddol a mentrau lleol yn cael eu cefnogi i ymateb i gyfleoedd ac anghenion lleol.** Mae gan y Cyngor rwydwaith o swyddogion i gefnogi a grymuso cymunedau a 'CIST' o grantiau i gefnogi prosiectau cymunedol penodol.



Byddwn yn targedu rhai cymunedau yn fwy na'i gilydd gan roi sylw arbennig i gynllunio cefnogaeth i ardaloedd gyda'r anghenion mwyaf.

Yn 2022/23 byddwn yn canolbwyntio ar ddatblygu cynlluniau adfywio lleol ar gyfer pob un o'r 13 dalgylch yng Ngwynedd.

Gwasanaeth Llyfrgelloedd

Mae'r Cyngor yn darparu gwasanaeth mewn 9 prif lyfrgell, 4 llyfrgell gymunedol a 3 dolen clicio a chasglu ar draws y sir. Mae'n bwysig i bobl Gwynedd eu bod yn gallu benthycu llyfrau a llyfrau llafar, a lawrlwytho e-lyfrau, e-lyfrau llafar ac e-gylchgronau o'u dewis. Benthycwyd 463,370 o eitemau gan bobl Gwynedd yn 2019/20 a 77,641 o eitemau yn 2020/21 (lleihad oherwydd cyfyngiad gwasanaeth oherwydd y pandemig). Ond nid yw holl drigolion Gwynedd yn gallu cyrraedd eu llyfrgell leol felly mae'r Cyngor hefyd yn darparu Gwasanaeth Llyfrgell i'r Cartref sy'n ymweld â 479 o unigolion yn fisol. Mae Llyfrgelloedd Gwynedd hefyd yn cael eu comisiynu gan yr Adran Addysg i ddarparu

gwasanaeth Lori Ni sy'n ymweld â phob Ysgol Gynradd, Arbennig a Dilydol ddwywaith y flwyddyn i fenthg llyfrau darllen i blant 3-11 oed. Rydym hefyd yn darparu Theatr/Sinema a Llyfrgell yn adeilad Neuadd Dwyfor ym Mhwillheli.

Mae pobl Gwynedd yn defnyddio'r llyfrgelloedd ar gyfer llawer iawn mwy na benthg llyfrau. Maent yn llefydd croesawgar i bobl eu defnyddio ar gyfer amryw o anghenion - i gael gwybodaeth am wasanaethau, ynghyd â chymorth a chefnogaeth i gyrchu gwybodaeth ar-lein. Mae Partneriaeth Addysg Oedolion Gwynedd a Môn trwy'r cymorth y Grant Addysg Gymunedol Oedolion, yn gweithio gyda Grŵp Llandrillo Menai ac Addysg Oedolion Cymru i gynnig nifer o gyrsiau byr a sesiynau blasu mewn amrediad o feysydd. Rydym hefyd yn cynnal gweithgareddau i Ddysgwyr Cymraeg, ac yn cynnal sesiynau i fabanod ac amseroedd stori i blant. Trwy ein Casgliadau Darllen yn Well, gellir cael mynediad at wybodaeth gellir ymddiried ynddo ar faterion iechyd a lles, yn cynnwys Dementia ac Iechyd Meddwl. Mae trigolion Gwynedd hefyd yn gallu defnyddio un o'r 96 o gyfrifiaduron, neu'r wi-fi, sydd yn y llyfrgelloedd yn rhad ac am ddim i chwilio am waith, neu i gael mynediad at wasanaethau lleol, yn ogystal â gallu llungopio a sganio. Darperir rhaglen o ffilmiau, sioeau a digwyddiadau diwylliannol yn Neuadd Dwyfor, Pwllheli.

Derbyniodd Gwasanaeth Llyfrgelloedd Gwynedd adroddiad ardderchog ar ei berfformiad yn 2019/20, sy'n dangos fod y gwasanaeth yn perfformio'n dda oddi mewn i Fframwaith Asesu Safonau Llyfrgelloedd Cyhoeddus Cymru. Yn sgil Covid-19 mae'r llyfrgelloedd wedi bod ar gau i'r cyhoedd am gyfnodau helaeth, ond mae gwasanaethau amgen, gan gynnwys clicio a chasglu wedi bod ar gael.

Yn 2022/23 byddwn yn:

- parhau i gydweithio gyda chymunedau a hyrwyddo mynediad i'r gwasanaeth, gan sicrhau bod ein darpariaeth yn adlewyrchu gofynion ac anghenion pobl Gwynedd
- cydweithio fel Partneriaeth Addysg Oedolion Gwynedd a Môn i gynllunio rhaglen gynhwysfawr o gyfleoedd dysgu i bobl Gwynedd yn y cymunedau
- ail agor Neuadd Dwyfor yn llawn i'r cyhoedd a pharatoi achos busnes i'w chynnal i'r dyfodol.

35,596

o bobl Gwynedd yn aelodau o Lyfrgell



Gwasanaeth Archifau



9,843

o ddogfennau wedi eu gweld gan y cyhoedd yn 2019-20

Mae gan y Cyngor gyfrifoldeb statudol i **warchod ein cofnodion cyhoeddus a gwneud yn siŵr fod gan bobl fynediad atynt.** Rydym yn gwneud hyn trwy ddau archifdy yng Ngwynedd - Archifdy Caernarfon ac Archifdy Meirionnydd yn Nolgellau.

Mae gan Archifdai Gwynedd ystod eang o ddogfennau, lluniau, mapiau a phapurau newydd, gyda'r ddogfen hynaf yn dyddio'n ôl i 1176. Ceir amrediad o gasgliadau cyhoeddus, swyddogol a phreifat sy'n adlewyrchu diwylliant a threftadaeth cymunedau Gwynedd. Mae'r Archifdai yn darparu sesiynau blasu, a chysiau hanes teulu ac yn cydweithio gydag ysgolion Gwynedd.

Yn 2022/23 byddwn yn:

- arwain ar gydweithio gydag archifau ar draws y Gogledd a Llywodraeth Cymru i weithredu Achos Busnes Partneriaeth Archifau Gogledd Cymru sy'n ceisio adnabod cyfleoedd i wneud y defnydd gorau o adnoddau archifau yn y rhanbarth er budd pobl y Gogledd
- adnabod cost digido'r casgliadau a chydweithio i adnabod systemau i alluogi mynediad i gasgliadau digidol.
- amlygu'r cyfleoedd all archifau Gwynedd eu cynnig ar gyfer Cwricwlwm i Gymru.

Gwasanaeth Amgueddfeydd a'r Celfyddydau

Mae'r gwasanaeth yn rhedeg dwy amgueddfa yng Ngwynedd sef Storiell ym Mangor ac Amgueddfa Lloyd George yn Llanystumdwy, gan ofalu am eu casgliadau; rhoi mynediad atynt a threfnu gweithgareddau i'n cymunedau.

Mae llawer o'n gwaith yn y maes celfyddydau cymunedol yn targedu **prosiectau iechyd, lles, addysg a thaclo unigrwydd**. Mae'r gwasanaeth hefyd yn gyfrifol am ddyrannu grantiau celfyddydol er mwyn cefnogi safon a chyfleoedd celfyddydol i bawb.

Ail agorwyd yr amgueddfeydd yn ystod 2021 gyda rhai elfennau'n agor yn raddol fel llogi a gweithgareddau. Mae'r gweithgareddau celfyddydol yn cael eu darparu yn rhithiol; trwy becynnau yn cael eu hanfon at ein cymunedau a gyda rhai yn cael eu trefnu yn ffisegol ar safleoedd o'r Hydref 2021.

Ein nod fydd parhau i gyfoethogi bywydau trigolion Gwynedd trwy hyrwyddo dealltwriaeth o'n hetifeddiaeth a'n diwylliant unigryw.

Yn 2022/23 byddwn yn:

- gweithio gyda Chyfeillion Amgueddfa Lloyd George i greu ffordd newydd o reoli'r Amgueddfa
- sicrhau llwyddiant cynllun Storiell a sefydlu Ymddiriedolaeth Ddatblygu ar ei chyfer allai weithio gyda'r sector gelfyddydol a threftadaeth yng Ngwynedd yn y dyfodol
- gweithio gyda'r sector gelfyddydol i adolygu ein cynllun i'r celfyddydau a gweithredu ar ei hamcanion
- cyfrannu at ddatblygiad Cynllun Diwylliant i Wynedd.



64,000


o bobl wedi ymgysylltu
gydag ein hamgueddfeydd
yn 2019/20

Gwasanaeth Hamdden a Pharciau Gwledig

Rydym yn cydweithio gyda phartneriaid yn lleol, yn rhanbarthol ac yn genedlaethol er mwyn ysbrydoli, cefnogi a galluogi pobl Gwynedd i fod yn egniol a byw eu bywydau yn iach.

Mae tueddiadau iechyd trigolion Gwynedd ychydig is na'r cyfartaledd cenedlaethol. Gyda lefelau gordewdra plant 4 oed yng Ngwynedd ymysg yr uchaf yng Nghymru, mae'n allweddol fod Cyngor Gwynedd a phartneriaid yn ymateb a chreu'r amodau i hyrwyddo byw'n iach.

Mae gan Gyngor Gwynedd rwydwaith o 12 o ganolfannau hamdden ar draws Gwynedd sy'n denu 1.3 miliwn o ymweliadau bob blwyddyn. Mae'r ddarpariaeth yma yn galluogi trigolion Gwynedd o bob oedran i ddysgu sgiliau newydd a mwynhau cymryd rhan mewn gweithgareddau egniol mewn lleoliadau diogel.



Mae Cyngor Gwynedd wedi ymrwymo i barhau i ddarparu'r cyfleusterau hyn ac wedi sefydlu Cwmni Byw'n Iach Cyf. er mwyn rhedeg y canolfannau ar ei rhan i'r dyfodol. Mae'r Adran wedi gosod cytundeb i'r cwmni i reoli'r gwasanaeth ers mis Ebrill 2019 ac rydym yn monitro'r cytundeb yn rheolaidd er mwyn

sicrhau ansawdd y gwasanaeth. O ganlyniad i gyfyngiadau Covid-19 mae'r canolfannau wedi gorfod bod ar gau am gyfnodau helaeth yn ystod 2020 a 2021.

Yn ogystal i reoli'r cyfleusterau hyn mae'r Cyngor hefyd wedi cytundebu gyda Chwmni Byw'n Iach i ddarparu rhaglenni allweddol i wella cynhwysiad mewn chwaraeon a gweithgareddau ffitrwydd. Mae Rhaglen Chwaraeon Cymunedol yn hyrwyddo gweithgareddau egniol cynhwysol i bobl ifanc ac i bobl hŷn mewn canolfannau, ysgolion, clybiau ac yn y gymuned ac mae Rhaglen Cyfeirio i Ymarfer yn helpu lleihau effaith cyflyrau sy'n atal trigolion Gwynedd rhag ymarfer a gwella eu hiechyd. Mae cynnydd sylweddol wedi bod yn niferoedd y cleientiaid ar gyfer y gwasanaeth yma, yn arbennig yn y meysydd dementia a chyflyrau cronig, ac mae tystiolaeth glir yn dangos effaith y buddsoddiad ar ansawdd bywyd ac iechyd.

Mae'r Cyngor hefyd yn rheoli parciau gwledig yng Nglynllifon a Phadarn. Mae'r parciau hyn yn safleoedd treftadaeth pwysig ac yn atyniadau poblogaidd i ymwelwyr. Ond mae'r parciau hefyd yn asedau gwerthfawr i wella llesiant trigolion Gwynedd ac i hyrwyddo byw'n iach. Bydd yr Adran yn ceisio sicrhau mwy o fudd i gymunedau lleol o'r asedau hyn i'r dyfodol.

Yn 2022/23 byddwn yn parhau i gefnogi Cwmni Byw'n Iach ac yn:

- buddsoddi mewn cyfleusterau chwaraeon a hamdden i ymateb i'r galw
- cydweithio gyda Chwaraeon Gogledd Cymru i hyrwyddo cynhwysiad mewn chwaraeon
- uwchraddio cyfleusterau Parc Padarn a datblygu opsiynau rheoli Parciau Gwledig Glynllifon a Pharc Padarn i'r dyfodol.

Mae blaenoriaethau lleol wedi cael eu nodi yng Nghynllun y Cyngor ers 2018/19 gan ymateb i'r anghenion oedd wedi eu codi gan Gynghorwyr lleol. Mae'r Adran wedi defnyddio'r blaenoriaethau

hyn wrth ddatblygu eu rhaglenni gwaith ehangach, ac felly mae nifer o'r anghenion yn cael eu cyfarch drwy waith sydd eisoes wedi ei ddisgrifio yn y Cynllun Adran hwn.

Isod rydym yn rhestru'r blaenoriaethau lleol ochr yn ochr â'r rhaglen neu brosiect sydd wedi ei chynllunio er mwyn ymateb i'r angen lleol a sirol hwnnw.

Blaenoriaethau Lleol	Rhoglen
<p>Wrth ymgynghori gyda chynghorwyr lleol ardaloedd Porthmadog, Ffestiniog a Phenllyn yn ôl yn haf 2017, nodwyd dyhead i ddenu mwy o swyddi tymor hir sy'n talu cyflogau da er mwyn gwella sefyllfa economaidd trigolion lleol. Mae'r flaenoriaeth Creu Swyddi Gwerth Uchel yn datblygu cyfleoedd newydd yn Nhrawsfynydd a Llanbedr fydd yn elwa'r cymunedau hyn. Yn ardal Porthmadog, nodwyd yn ogystal fod pryder ymysg y cynghorwyr lleol ynglŷn â chyflwr rhai safleoedd segur yn yr ardal ac mewn ymateb i hyn byddwn yn effro i unrhyw gyfleoedd i gefnogi gwella neu aildddefnyddio'r safleoedd.</p>	<ul style="list-style-type: none"> • Swyddi Gwerth Uchel • Hybu Canol Tref
<p>Wrth ymgynghori gyda chynghorwyr ardal Dolgellau daeth i'r amlwg fod cysylltedd gwael ffonau symudol a band eang yn llesteirio trigolion a busnesau'r ardal. Rydym yn ceisio sicrhau blaenoriaeth i'r sir gan Lywodraeth Cymru ar gyfer cynlluniau yn y maes drwy ddilyn egwyddorion Gwynedd Ddigidol.</p>	<ul style="list-style-type: none"> • Gweledigaeth Twf Gogledd Cymru • Arloesi Gwynedd Wledig
<p>Yn ardaloedd Dyffryn Ogwen a Dyffryn Nantlle, nododd y cynghorwyr lleol fod hyrwyddo ac adfywio'r stryd fawr yn flaenoriaeth leol, ac rydym wedi gwneud ceisiadau amlinellol ar gyfer peth gweithgaredd adfywio yn yr ardaloedd yma.</p>	<ul style="list-style-type: none"> • Hybu Canol Tref
<p>Wrth ymgynghori gyda chynghorwyr ardal Bangor, nodwyd dyhead i wella edrychiad yr ardal leol ac i ymateb i siopau gwag, gan nodi dymuniad i gydweithio â phartneriaid megis busnesau lleol a Chynghorau Tref a Chymuned i greu incwm er mwyn cyfrannu at y gwaith. Gallai hyn yn ei dro gefnogi busnesau a chrefftwyr lleol. Rydym yn ystyried y cyfleoedd i adeiladu ar y gwaith a wneir eisoes ar y cyd ag Ardal Gwella Busnes Bangor a'n partneriaid yn lleol ac yn rhanbarthol er mwyn llunio ymateb. Mae arian grant ychwanegol i uchafu budd y Cynllun Benthyciadau di-log wedi ei sicrhau.</p>	<ul style="list-style-type: none"> •Hybu Canol Tref
<p>Mae cyswllt hefyd gyda'r flaenoriaeth sirol ar gyfer rhoi Treftadaeth Llechi Gwynedd ar waith. Dylai adfywio'r ardaloedd yma wella unrhyw ddelwedd negyddol sy'n deillio o fod yn ardaloedd ôl-ddiwidiannol gan ryddhau eu potensial.</p>	<ul style="list-style-type: none"> • Rhoi Treftadaeth Lechi Gwynedd ar Waith
<p>Yn ystod sesiwn ymgynghori yn ardal Ffestiniog fe ddaeth i'r amlwg fod pryderon ymysg cynghorwyr lleol ynglŷn â dyfodol y Ganolfan Gymunedol a'r gwasanaethau a leolir yno. Cynhaliodd y tîm Adfywio arolwg diweddar ar adeiladau cyhoeddus ar hyd a lled Gwynedd. Dangosodd yr arolwg fod defnydd aneffeithiol yn cael ei wneud o nifer o adeiladau cyhoeddus ym Mlaenau Ffestiniog gan gynnwys y Ganolfan Gymunedol. Mae cyfle yma, mewn cyfnod o gynni ariannol, i rannu adnoddau yn well i'r dyfodol.</p>	<ul style="list-style-type: none"> • Gwasanaeth Cefnogi Cymunedau

Mae'r gwaith dydd i ddydd yr Adran hon yn cyfrannu tuag at Amcanion Llesiant Gwynedd canlynol gan sicrhau fod trigolion Gwynedd yn:

Mwynhau bywyd hapus, iach a diogel

Ennill cyflog digonol i ni fedru cynnal ein hunain a'n teuluoedd

Cael byw mewn cartrefi o ansawdd o fewn eu cymunedau

Cael byw mewn cymdeithas naturiol Gymraeg

Cael manteisio ar harddwch amgylchedd naturiol y sir.